

# Sultan Pahang, Anwar 'bertembung' di bazar Ramadan

Mac 23, 2024 @ 8:29pm



Perdana Menteri menyantuni orang ramai di Bazar Ramadan Mahkota Square, Kuantan hari ini.

KUANTAN: Sultan Pahang, Al-Sultan Abdullah Ri'ayatuddin Al-Mustafa Billah Shah dan Perdana Menteri, Datuk Seri Anwar Ibrahim hari ini 'bertembung' di Bazar Ramadan Mahkota Square di sini.

Al-Sultan Abdullah yang diiringi Tengku Ampuan Pahang, Tunku Azizah Aminah Maimunah Iskandariah berselisih dengan Anwar ketika tiba di bazar berkenaan untuk membeli juadah berbuka puasa pada 6.35 petang.

Baginda berdua berkenan bertegur sapa dan berbual pendek bersama Anwar yang mengadakan jelajah mesra di bazar berkenaan.

Perdana Menteri tiba di bazar itu sekitar 6.20 petang diiringi Menteri Besar Pahang, Datuk Seri Wan Rosdy Wan Ismail bersama kepimpinan kerajaan negeri yang lain.

Beliau yang berbaju Melayu beramah mesra dan menyapa peniaga serta pengunjung sambil merakamkan gambar kenangan.

Usai lawatan itu, Perdana Menteri dijadual berbuka puasa di Masjid Tengku Ampuan Afzan, Indera Mahkota di sini.

Terdahulu, Anwar menghadiri Majlis Menghadap Sultan Pahang di Istana Abdulaziz di sini, petang tadi. – BERNAMA



Sultan Pahang dan Tengku Ampuan Pahang berbual-bual dengan Anwar di Istana Abdulaziz, di Kuantan. - Foto BERNAMA